

NAQQIUT**Taarserpaa akissuteqaat 7. oktober 2012-imeersoq**

Aatsitassarsiornermi ingerlatassanilu annertuuni suliffeqarfiit namminersortut sulisussanik avataaneersunik atuisinnaanermut atatillugu akissarsianut sulinermilu atugarisanut atuuttussat pillugit pisortat akuersissuteqaraangamik sutigut tamatigut sulinermut immikkut piumasaqaatit ILO-mi isumaqatigiisummi 94-imi, pingaernerusumillu art. 2-mi allassimasut, qulakkersimasarnissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut.
(Inatsisartunut ilaasortaq, Naaja Nathanielsen, Inuit Ataqatigiit)

Akissuteqaat

(Inuussutissarsiornermut Aatsitassanullu Naalakkersooq)

Siullermeenera

Aallaqqaasiullugu erseqqissaatigissarava pisortanut isumaqatigiisutini sulinermut immikkut piumasaqaatit pillugit ILO-mi isumaqatigiisut nr. 94, taamaallaat pisortat akiligaannik illuliortititernissamik sanaartornissamillu pisortanut isumaqatigiisutini atorneqartarmat. Akerlianilli namminersortut aningaasalersugaannik illuliortiternissamut sanaartornissamullu isumaqatigiisutini isumaqatigiisut atorneqarneq ajorpoq, soorlu aatsitassarsiornermik suliniutinut imaluunniit suliniutinut angisuunut atorneqarneq ajorluni.

Siunnersuuteqartup tunngavilersuutimini oqaatigaa, siunnersuutip akuerineqarnera suliffeqarfiit ilaasa aatsitassarsiornermik suliniummik unitsitsinnarnerannik kinguneqarsinnaasoq. Tamanna Naalakkersuisut isumaqatigaat, suliniutillu pilersaarutaasut piviusunnagortissinnaanerat pillugu siunnersuummik akuersissuteqarnerup aalajangiisutut pingaaruteqalersinnaanera isumaqatigalugu.

Taamaasilluni namminersorlutik inuussutissarsiortut akornanni aalajangersimasumik suliaqarfiusut kisiisa isumaqatigiisummik, pisortat illuliortiternermik sanaartornermillu suliarinnittussarsiuussisarnerannut atorneqartussanut naatsorsuussamik malinninnissamik pisussaaffilernissaat eqqumiilluinnassaaq. Aatsitassarsiornermik suliaqarfik sulisitsisunik sulisitanik amerlaqisunik atuiffiusarpoq, taakkunanga amerlaqisut suliffeqarfiullutik nunanit allaneersut, suliasanik piffissaa killiligaasunik suliarinnittartut. Sulisitsisut taakku aatsitassarsiornermi suliniutini imaluunniit suliniutini angisuuni suliffeqarfiutaat suliaqaraangamik ILO-mi isumaqatigiisummik nr. 94-imi malitsinissamik pisussaaffilertarnissaannut, ingerlatanili allani suliaqaraangamik taamatut iliortannginnissaannut immikkut ittumik inatsiliortoqarnissaa pisariaqassaaq. Suliffeqarfiit taakku inuussutissarsiutinik suliniutinik allanik suliaqaraangata piumasaqaataasumut attuumassuteqassanngillat.

Nunatsinni aningaasarsiat pillugit siornagut ileqquliussaasimasumik inatsisitigut aalajangersaasoqartarsimangilaq.

Aatsitassarsiornermik suliaqarfiusumi suliniutinilu angisuuni aningaasarsiat

minnerpaaffissaannik qaffasissunik inatsisitigullu aalajangersagaasunik qaffasissusiliineq unammillersinnaasusitsinnut sanngereersumut ajorseriaataasunik kinguneqassaaq. Sulisoqarnermut tunngasuni oqimaatigiinngitsumik pissutsit suli annertunerulissapput, sulisinnaasullu ilaat suli avataaniititaanerulissallutik, taamaasillunilu aamma aningaasarsiornerup imminut nammassinnaasunngortinnissaanut periarfissakinnerulersitsissalluni. Suliniutit angisuut eqqarsaatigalugit suliniutit suliffinnik ataavartunik amerlaqisunik kinguneqarsinnaagaluit Nunatsinni piviusunngortinneqannginnissaat immikkut ulorianaataavoq, nunanili sanaartornerup nalaani aningaasarsiakinneruffiusuni piviusunngortinneqassallutik. Tassalu nunani aningaasaliiffigissallugit akikinnerusuni.

Taamaattorli Sulisoqarnermut Ministereqarfimmi aamma Nunanut allanut Ministereqarfimmi ILO-p Najoqqutassiaani artikel 35, atortussanngortitsisarnernik aalajangersaasusooq nalornissutigineqarsimavoq. Kalaallit Nunaanni isumaqatigiissut nr. 94-ip atuutsissaneramik Inatsisartut isummersinnaanerata sioqqullugu nalornissuteqarneq tamanna qulaajarneqassaaq.

Aammattaq nalornissutigisaq paasisaqarnissamillu pisariaqartitsineq Sulisoqarnermut Ministereqarfimmit allakkiamit 7. oktober 2012-imik ullulerneqarsimasumit malitseqarpoq. Naalackersuisut allakkiaq e-mailikkut ataasinngornermi 8. oktoberimi, nal. 13:50 tiguaat. Isumaqatigiissutit arlallit Kalaallit Nunaannut atuuttuunerat pillugu ukiuni arlalissuarni annertuumik nalornissuteqartoqartarsimanera, ilaatigullu ILO-mi isumaqatigiissummut nr. 94-imut tunngatillugu Ministereqarfiup allakkiami inerniliissutitut paasinerarpa. Ministereqarfillu nangilluni allappoq siusinnerusukkut – ILO-p, Danmarkip aamma Kalaallit Nunaata akornanni allaqatigiittarnikkut isumaqatigiissut sorliit Kalaallit Nunaannut atuuttuunersut paasinarsinerat misilerarneqartarsimasut. Qaqugukkulli inaarutaasumik inerniliisoqarpassimanani. Taamaalilluni illuatungeriit pingasut akuerisaannik arlaannik ”inernerititamik” uppersaateqartoqannginnera Ministereqarfiup oqaatigaa. Taamaattorli Sulisoqarnermut Ministereqarfiup paasinninnera naapertorlugu ILO-mi isumaqatigiissut Kalaallit Nunaannut atorneqarsinnaavoq, akuersissuteqarnerup nalaani Kalaallit Nunaat suliaqarfiusumik tigusinnissimanani danskit isumaqatigiissummik akuersissuteqarnerminnik ILO-mut tamanna pillugu nalunaaruteqarsimanngikkaluarpataluunniit.

Ukiut qulikkaartut ingerlaneranni ILO-mi Najoqqutassiami artikel 35 naapertorlugu Kalaallit Nunaat nunap pingaarnerusup avataaniittutut nunap ilaasuuneramik ILO-mi allaffeqarfik isumaqarsimavoq, taamaalillutillu isumaqatigiissutaasup danskinit akuersissutiginerata nalaani imaluunniit kingusinnerusukkut tamanna pillugu immikkut ittumik nalunaaruteqartoqanngippat Kalaallit Nunaannut ILO-mi isumaqatigiissutaasut atuutissanatik. Aammattaq ilaatigut isumaqatigiissummi nr. 94-ip Kalaallit Nunaannut atuutissannginneramik ILO-mi allaffeqarfik isumaqarsimavoq.

Naalackersuisut 2011-p naanerani aamma 2012-imi ILO-mi allaffeqarfimmut saaffiginnissimapput allaffeqarfiullu isumaanik oqaluuserinnissimallutik.

Tamatuminnga tunngaveqarluni ILO-mi allaffeqarfiup naalackersuisunut 2012-imi aprilimi allakkatigut nalunaarpoq allaffeqarfiup ilaatigut isumaqatigiissummi nr. 94 Kalaallit Nunaannut atuussinnaasutut isiginiaraa, kingornatigut qaammatit pingasut iluini naalackersuisut tamanna pillugu allakkatigut allamik nalunaaruteqassanngippata.

ILO-mi isumaqatigiissutit sorliit Kalaallit Nunaannut atuuttussaaneramik Naalackersuisut aamma Inatsisartut isummernissaannut suliap saqqummiunneqarnissaa pillugu piaarnerpaamik aammalu qaammatinik pingasunik piffissaliissutip qaangiutinnginnerani danskit naalackersuisuisa ILO-mi allaffeqarfimmut nalunaaruteqarnissaat allakkatigut 24. maj

2012-imi ullulernerqartutigut sulisoqarnermut ministeri qinnuigisimavara. Danskit naalackersuisuisa taamatut isumaqatigiissuteqannginneranni ILO-mi Najoqqutassiami artikelit Kalaallit Nunaannut pingaarutillit nassuiaatigineri pillugit Naalackersuisunit oqaaseqaateqarfigisassanngorlugit saqqummiunneqartarnissaannik ILO-mi allaffeqarfimmik isumaqatigiissuteqartarnissaq danskit naalackersuisuisa ILO-mi allaffeqarfimmut nalunaarutigisassagaat allakkanni aamma qinnutigaara.

ILO-mi allaffeqarfimmut allakkani 22. juni 2012-imeersuni danskit naalackersuisuisa qaammatinik pingasunik piffissaliissummik ILO-mi allaffeqarfiup piffissaliiffittut killeqarfeerutsinnissaanik qinnutigaat, pineqartumi danskit naalackersuisui aamma Naalackersuisut ataatsimoorullugu paasinnissuseqarnissaasa tungaannut, tamatuminngalu allaffeqarfimmut nalunaarutiginninnissaasa tungaanut atuuttussamik. Pineqartumi Naalackersuisut aamma Inatsisartut aalajangiussinerat tassaasoq danskit naalackersuisuisa pineqartumi inaarutaasumik akissuteqarnermik nalunaaruteqarnissaanut piumasaqaataasoq allakkani aamma paasissutissiissutigineqarpoq.

Taamaattumik ullormut oqaluuserisassani immikkoortoq 19-imi aalajangiussassatut siunnersuummut atatitamut Naalackersuisut allannguutissatut siunnersuut manna saqqummiunniarpaat:

”ILO-mi isumaqatigiissut 94 pillugu apeqqummik nalornissutaasup peerneqarnissaa aammalu Inatsisartut oqaluuserinninnissaannut pitsaanerpaamik aalajangiussinissamik tunngavissiiinissaq siunertaralugit tamanna pillugu Naalackersuisut nassuiaasiornissaat peqqussutigineqarpoq.”

Ullormut oqaluuserisassani immikkoortoq 19-imut Naalackersuisut allannguutissatut siunnersuutaannut innersuuteqarlutik Naalackersuisut siunnersuutip itigartissutiginnissaa inassutigisavaat.